



Herremättli-Clique 1921

Sujet 2016

S goot alles dr Bach ab...

Brennt d'Sunne haiss vom Himmel aabe,
goot tout Bâle im Rhy go baade.
Ob vo Scheenebuech oder vo Ammel,
s Basel baade au jeenschdi Rammel.
Vom Belche bis zem Rhy, me isch aifach drbyy.

Vom Tinguely-Strand bis zer Dreyroose,
im Bikini, im Aidailer, oder mit Bermudahoose,
mit Sagg und Pagg im Goldfischsagg.
S isch in, im aigene Saich go plandsche,
mit em Fischsagg, em orangesche.

Esoo ka me kurz vergässe wies um uns stoot
und wie alles numme no dr Bach ab goot.....

Hesch kai Fisch fir d Glaider,
muesch am Rhybord blyybe, laider.

Oobacht jetze wirds grytisch
und e weeneli bolytisch...

Schwimmsch mit em Stroom, denn bisch im Fluss,
schwimmsch geege d Streemig, denn bisch duss.

Näbscht Schnääderänte, dunggle Kormoraan
und wysse Schwään,
schwimme au no groossi Kään,
mit no greessere Kapitään.
Drumm bass uff, sunscht kunsch drunder
und goosch emänd no under!
Bisch emool ganz unde, wie-n-e-n-Aal,
blybt dr nimme vyyl Guets zer Waal.....

Wenn d Kurve nit griegsch, das isch nit glooge,
driffsch dr Bruggepfyyler statt dr Booge.
Im Struudel hinter em Bruggebooge,
het's scho mänge aabezooge.

D Wirtschaftsfierer, die groosse,
mit de gfillte Segg in de Hoose,
leen uns s Loch ab dryybe
und luege as sy sälber oobe blyybe.

E jeede Schrey unter dr Mittlere Brugg,
schloots diräggt uff aim zrug.
Je länger dass me schwimmt im Wasser,
deschdo nasser wird das Wasser.
Schwimme, schwimme, schwimme, schwimme,
mänggmool mag me aifach nimme.....

Duet unseri Regierig no richtig tigge???
80 Millioone dr Bach ab schigge,
fir dr Friide mit de Rammel vom Land,
das isch doch wirgglig allerhand!

S Basel tigt me anderscht...
bsunders bi deene wo oobe schwimme!
Mänggmool verstoot mes aifach nimme.....

Am Uufer sinnele die junge Myysli.
Drfiir findsch dradizionell im Rhybadhyysli,
maischtens numme no die Alte,
mit de lääderig brüunte Falte.

Am Rhybord duet me Glepfer grille,
lääse, loose, schnuure, tschille.....
und sich hailloos d Biire fille.

Esoo ka me kurz vergässe wies um uns stoot
und wie alles numme no dr Bach ab goot.....

Liige losse dien mänggi Simpel,
iire gruusig Abfallgrimpel.
Voor luter Biggse, Fläsche und au Schäärbe,
kaas aim grad no die letshti Fraid verdäärbe.
D Container, die groosse blaue,
sinn halt numme fir die Schlaue.

Au Sauhind wo iiberaal dien pfunde,
hänn mir scho am Rhybord gfunde.

Bisch am Änd wiider duss, us däm Fluss,
nimmsch e Duschi geege s Stingge,
zem denn bi dr Buvette no e Bierli z dringge.

Esoo ka me kurz vergässe wies um uns stoot
und wie alles numme no dr Bach ab goot.....

Kasch am Rhybord d Oore stelle
und d Basler an ainer Hand abzelle.
Schwoobekääfer gheersch en masse,
und erscht no Expäts mit em Ami-Bass.
Dangg dr groosse Schneere,
kaa me au d Zircher guet uuseheere.

Vo wyt häär kemme armi Kaibe derhäär,
isch dr Wääg au no so schwäär,
wo doo gäärn in Milch und Hoonig wurde baade,
wie-n-e groossi fetti Maade.
S hett drunder au ainigi dunggli Gschtalte,
wo me nit jeede mehti bhalte...
und scho gaar nit mit uns loo schwimme!

Schwimme, schwimme, schwimme, schwimme,
mänggmool mag me aifach nimme.....

*Me bsuecht d'Waage- und Reggwysyte-Uusstellig bi dr Kasäärne
und d' Laddärne-Uusstellig uff em Minschterplatz.
Sy steen deert vom Määntig znacht bis am Mittwoch demoorge.*